

VENDIM
Nr.298, datë 22.12.2004

PËR HEQJEN E LICENCËS SË “TV SHIJAK”

Këshilli Kombëtar i Radios dhe i Televizionit, i përbërë nga:

Halil	Lalaj	Kryetar
Albert	Minga	Zëvendëskryetar
Sefedin	Çela	Anëtar
Lazër	Stani	Anëtar
Visar	Zhiti	Anëtar
Agim	Duro	Anëtar
Fatos	Lulo	Anëtar

mori në shqyrtim çështjen me:

OBJEKTI: Mbi heqjen e licencës së “TV Shijak”.

BAZA LIGJORE: Neni 7 pika 21 e ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë”, i ndryshuar, neni 33 pika 5, neni 40/1, vendimet e KKRT-së nr. 215, datë 26.2.2004 “Mbi shlyerjen me këste të pagesave për licencë për vitin 2003 të disa subjekteve televizive”, nr.265, datë 3.9.2004 “Mbi transmetimet pirate të subjektit TV Shijak”, nr.266, datë 30.9.2004 “Mbi vlefshmërinë e licencës së disa subjekteve televizive private” dhe nr.291, datë 12.11.2004 “Mbi vendosjen e disa detyrimeve ligjore ndaj televizionit vendor privat TV Shijak”.

Shoqëria “Media +” sh.a. është licencuar me vendimin nr.30, datë 14.11.2000 të KKRT-së si operator televiziv vendor privat, në fushën e transmetimeve tokësore analogjike për televizionin “TV Shijak”, me nr.licence 039/TVL. Afati i licencës është 5 vjet nga dita e botimit të vendimit për dhënien e licencës në Fletoren Zyrtare (3.1.2001).

Me vendimin nr.266 pika 1/3, datë 30.9.2004 “Mbi vlefshmërinë e licencës së disa subjekteve televizive private” Këshilli Kombëtar i Radios dhe i Televizionit ka vendosur të bëjë të pavlefshme licencën e subjektit televiziv vendor “TV Shijak”, pasi nuk ka shlyer pagesën vjetore të licencës për vitin 2003. Sipas pikës 2 të këtij vendimi, subjektit i është lënë një afat prej 15 ditësh, për të dhënë mendimin e tij në lidhje me këtë vendim.

Pasi dëgjoi pretendimet e subjektit, përfaqësuar nga z.Gëzim Ismaili, Këshilli Kombëtar i Radios dhe i Televizionit me vendimin nr.291, datë 12.11.2004 “Mbi vendosjen e disa detyrimeve ligjore ndaj televizionit vendor privat TV Shijak”, ka vendosur datën 30 nëntor 2004 si afat për:

- depozitimin nga ana e subjektit “TV Shijak” të dokumentacionit që vërteton se zotëron të drejtën e transmetimit të programeve me marrëveshje me kontratë shitje, shkëmbimi ose dhurimi si dhe për,

- shlyejen e pagesës vjetore të licencës për vitin 2003.

- Sipas pikës 2 të këtij vendimi, subjekti televiziv vendor privat “TV Shijak” detyrohej për ndërprerjen e menjëhershme të transmetimeve të paligjshme.

KËSHILLI KOMBËTAR I RADIOS DHE I TELEVISIONIT,

pasi dëgjoi relatorët e çështjes, znj. Argita Shkupi, z. Andrea Nathanaili dhe znj. Ermira Mushi, subjekti në mungesë,

VËREN:

I. Me vendimin nr.215 pika 1/8, datë 26.2.2004 “Mbi shlyerjen me këste të pagesave për licencë për vitin 2003 të disa subjekteve televizive”, Këshilli Kombëtar i Radios dhe i Televizionit ka miratuar shlyerjen me pesë këste të pagesës vjetore të licencës për vitin 2003, në shumën 528.8 mijë lekë të operatorit televiziv vendor privat “TV Shijak”. Afati për shlyerjen e kësaj pagese, bazuar në memorandum dypalësh të miratuar sipas pikës 2 të vendimit të mësipërm, ka qenë deri në datën 30 qershor 2004.

Ky memorandum i është dërguar subjektit “TV Shijak” me shkresën nr.254, datë 27.2.2004, por nuk është nënshkruar nga ana e tij. Subjekti, me gjithë kalimin e afateve për secilin këst, të përcaktuara në memorandum, nuk ka shlyer asnjë pjesë të pagesës vjetore të licencës për vitin 2003.

Në rastin e mospagimit të kësteve brenda afatit, në memorandum është parashikuar e drejta e KKRT-së për heqjen e licencës.

Bazuar në këtë vendim, KKRT me vendimin nr.266 pika 1/3, datë 30.9.2004, ka vendosur paraprakisht të bëjë të pavlefshme licencën e subjektit televiziv vendor “TV Shijak”.

KKRT-ja vëren se, bazuar në nenin 33 pika 5 të ligjit nr. 8410, datë 30.9.1998 “Për radion dhe televizionin publik e privat në Republikën e Shqipërisë”, ka të drejtë të bëjë të pavlefshme licencën kur subjekti nuk realizon detyrimet financiare të parashikuara me ligj.

II. Gjithashtu, grupi i inspektimit të Këshillit Kombëtar të Radios dhe të Televizionit, ka ndjekur në vazhdimësi funksionimin ligjor të subjektit “TV Shijak”, lidhur me shkeljen e të drejtave të transmetimit për programet e transmetuara.

Për programet e transmetuara i është kërkuar subjektit “TV Shijak” dokumentacioni që vërteton të drejtën e transmetimit, duke caktuar dhe afate për depozitimin e tyre. Ekziston një praktikë e gjerë shkresore, e cila ka filluar që në momentin e hyrjes në fuqi të ligjit nr.9124, datë 29.7.2003 “Për disa ndryshime në ligjin nr.8410, datë 30.9.1998 “Për radion dhe televizionin publik e privat në Republikën e Shqipërisë””.

Transmetimet e paligjshme janë të regjistruara dhe të ruajtura në KKRT.

Për shkelje konkrete, subjekti “TV Shijak” është ndëshkuar nga grupi i inspektimit të KKRT-së me gjobat si vijojnë, duke arritur shumën totale 19 000 000 lekë:

- a) Gjoba nr. 0048, datë 21.10.2003 në masën 200 000 lekë;
- b) Gjoba nr. 0052, datë 22.10.2003 në masën 400 000 lekë;
- c) Gjoba nr. 0053, datë 24.10.2003 në masën 500 000 lekë;
- d) Gjoba nr. 0054, datë 27.10.2003 në masën 600 000 lekë;
- e) Gjoba nr. 0056, datë 15.12.2003 në masën 200 000 lekë.

Për katër gjobat e para, subjekti ka bërë në datën 30.10.2003 ankim në KKRT, duke kërkuar anulimin e gjobave të vendosura nga grupi i inspektimit të KKRT-së. Pas shqyrtimit të kësaj ankesë, KKRT-ja ka vendosur me vendimin nr.193, datë 14.11.2003 miratimin e gjobave të vendosura nga grupi i inspektimit. Për ekzekutimin e këtij vendimi, është ngarkuar me urdhër të posaçëm (nr. 92, datë 26.11.2003), në mbështetje të nenit 137/5 “Bashkëpunimi me organet e tjera”, Policia Tatimore.

KKRT-ja vëren se, pas vendosjes së gjobës së pestë, nga ana e subjektit “TV Shijak” është ndërprerë transmetimi i programeve të kundërligjshme. Këto transmetime kanë rifilluar në muajin korrik 2004 me disa veprimtari sportive pirate, e më vonë me transmetimin e përditshëm të filmave artistikë, për të cilët nuk është paraqitur asnjë dokumentacion.

KKRT-ja vëren se, në bazë të nenit 40/1 të ligjit nr.8410, datë 30.9.1998, të ndryshuar, operatorët radiotelevizivë të licencuar detyrohen të depozitojnë pranë Këshillit Kombëtar të Radios dhe Televizionit dokumentacionin që vërteton se zotërojnë të drejtën e transmetimit të programeve me marrëveshje me kontratë shitje, shkëmbimi ose dhurimi.

Gjithashtu, në bazë të nenit 137/4 pika 7 parashikohet dënim me gjobë nga 200 000 deri në 1 000 000 lekë, kur subjektet RTV transmetojnë programe që nuk i kanë prodhuar vetë dhe për të cilat nuk kanë marrëveshje, kontratë shitje shkëmbimi ose dhurimi nga subjektet e tjera radiotelevizive, prodhuesit apo shpërndarësit e autorizuar të tyre. Përsëritja e kësaj shkeljeje më shumë se 5 herë dënohet me uljen deri në 50 për qind të afatit të licencës. Në rast ripërsëritjeje shkelja ndëshkohet me heqjen e licencës.

Me vendimin nr.265, datë 3.9.2004 “Mbi transmetimet pirate të subjektit TV Shijak”, pasi dëgjoi pretendimet e subjektit, përfaqësuar nga Z.Gëzim Ismaili, i cili deklaroi se të gjitha programet e transmetuara janë me të drejta të ligjshme, Këshilli Kombëtar i Radios dhe i Televizionit vendosi datën 24 shtator 2004 si afat të fundit për depozitimin nga ana e subjektit “TV Shijak” të dokumentacionit që vërteton se zotëron të drejtën e transmetimit të programeve me marrëveshje me kontratë shitje, shkëmbimi ose dhurimi.

Nga ana e subjektit “TV Shijak”, në datën 6.10.2004 janë depozituar vetëm tri fatura të lëshuara nga Rai Trade, me nr.40531, 40532 dhe 40533 të datës 31.3.2004 për blerjen e telenovelës “Cuori rubati”.

Mbi bazën e vendimit nr.265, pasi dëgjoi dhe pretendimet e subjektit, me vendimin nr. 291, datë 12.11.2004 “Mbi vendosjen e disa detyrimeve ligjore ndaj televizionit vendor privat TV Shijak”, Këshilli Kombëtar i Radios dhe i Televizionit vendosi datën 30 nëntor 2004, si afat për:

- depozitimin nga ana e subjektit “TV Shijak” të dokumentacionit që vërteton se zotëron të

drejtën e transmetimit të programeve me marrëveshje me kontratë shitje, shkëmbimi ose dhurimi, si dhe për,

- shlyerjen e pagesës vjetore të licencës për vitin 2003.

Sipas pikës 2 të këtij vendimi, subjekti televiziv vendor privat “TV Shijak” detyrohej të ndërpriste menjëherë transmetimet e paligjshme.

Në lidhje me këtë vendim, Departamenti i Programeve vazhdoi monitorimin e transmetimeve të operatorit “TV Shijak” për periudhën nga data 12 nëntor 2004, që është edhe data e hyrjes në fuqi, e deri në datën 30 nëntor 2004 si afati i fundit i përcaktuar në vendim për plotësimin e detyrimeve të përcaktuara nga KKRT.

Nga ky monitorim rezultoi që:

- Subjekti televiziv “Shijak”, nuk ka paraqitur asnjë dokumentacion që vërteton se zotëron të drejtën e transmetimit të programeve.

- Televizioni “Shijak”, nuk ndërpreu transmetimet e paligjshme, siç kërkohet në pikën 2 të vendimit nr.219 të KKRT-së. Nga momenti i hyrjes në fuqi të këtij vendimi e deri në datën 30 nëntor janë transmetuar nga “TV Shijak” në mënyrë pirate filma artistikë, dokumentarë apo koncerte për të cilat nuk ka paraqitur dokumentacionin e duhur.

Gjithashtu, televizioni “Shijak”, ka vazhduar edhe gjatë muajit dhjetor 2004 të transmetojë programe pirate, duke shkelur kërkesat e vendimit nr.291, datë 12.11.2004 të KKRT-së, si dhe kërkesat e ligjit nr.9124, datë 29.7.2003. Këto transmetime janë monitoruar me sondazhe dhe janë të regjistruara dhe të arkivuara.

Televizioni “Shijak” nuk ka zbatuar as pikën 4 të vendimit të sipërpërmendur, lidhur me publikimin e këtij vendimi në edicionet informative.

Aktualisht, “TV Shijak” vazhdon ende të transmetojë programe pirate, duke cenuar konkurrencën e ndershme në fushën e mediave elektronike, ndërkohë që operatorë të tjerë radiotelevizivë kanë shpenzuar shuma të konsiderueshme për blerjen e tyre.

Në mbështetje të nenit 137/3 “Për t’i dhënë të licencuarit mundësi të japë mendime, para marrjes së vendimit për ndalimin, reduktimin ose heqjen e licencës, KKRT-ja njofton të licencuarin për vendimin dhe arsyet e marrjes së këtij vendimi”, është njoftuar subjekti me shkresën nr.1270/2, datë 16.12.2004.

PËR KËTO ARSYE,

Këshilli Kombëtar i Radios dhe i Televizionit, në bazë të neneve 7 pika 21, 33, pika 5 dhe 40/1 të ligjit nr.8410, datë 30.9.1998 “Për radion dhe televizionin publik e privat në Republikën e Shqipërisë” të ndryshuar, të vendimeve të KKRT-së nr.215, datë 26.2.2004, nr.265, datë 3.9.2004, nr.266, datë 30.9.2004 dhe nr.291, datë 12.11.2004

VENDOSI:

1. T’i heqë licencën shoqërisë “Media +” sh.a. për televizionin vendor privat “TV Shijak”;
2. Licenca nr.039/TVL bëhet e pavlefshme;
3. Subjekti “TV Shijak” është i detyruar të ndërpresë menjëherë transmetimin;
4. Kundër këtij vendimi mund të bëhet ankim brenda një muaji në gjykatë, në përputhje me Kodin e Procedurës Civile, kreu “Gjykimi i mosmarrëveshjeve administrative”;
5. Ky vendim hyn në fuqi pas botimit në Fletoren Zyrtare.

KRYETARI
Halil Lalaj